

1 Son

Pas mami Son ai sürü papimarandi

Yangiri ningombo hoafi

1 ¹Yangiri ningombo hoafi ranahambo siheimbo sürü paparihundi. Horombo hondü ai mengoro, nga ro ahambo himboriyefi yihoe fi himboarinambo hoeirihu mburihu sündihu marihundi. ²Yangiri ningombo ra weindahi tüküme feyo, nga hoeirihu hohu anihondumboane fi hoafiyefihumbo siheimbo bokararihehundi. Horombo ai Afindi-dibo manüngu, nga yihoe fimbo sowahi weindahi tüküme fiyu. ³Se ro-babidi wudimbohündambo nine-moatükuni ro hoeirihu himboriyefi marihundi ra siheimbo bokararihehundi. Nga ro Ape God asu ahandi Nimori Sisas Krai ai-babidimbo wudiyefi arihundi. ⁴Sihiri afindi safi hihifi-hihifindefo sefi hohu hoafi nda sürü paparihundi.

Sihiri sihi ngefimboane

⁵Hoafi ra Kraiindi-mayo hoaf-ane himbori-yefeimbihündi siheimbo rarihu bokarihehundühi sefiya, 'God ai si nahurai-ani, nga moai ahambo sowahi nimbi nimaro,' asefi. ⁶Sihiri hoafiyefihüya, 'Roana ai-dibo wudayefi,' sefi hohu asu nimbokoani hefi arihundi ana, sihiri tikarihu hohumboane fi hoafiyefi arihundi, nga anihondü hohoanimo moai süngurihundi. ⁷Nga sihiri sirihü ahefi ana, ai sirihü amaru nou sihiri Kristen wandafi mami-babidi wudiyefi arihundi asu ahandi Nimori Sisasindi hori sihefi hohoanimo moaruwai mungu gogorihairanda sihiri aboediyefi arihundi. ⁸Sihiri hoafiyefihü, 'Ro moai moaruwai hohoanimo yefi,' asefi ana, sihefihoari tikarihu hohumboane fi asu anihondü hoafi sihefi ngusüfoambe moai nimaro. ⁹God ai didiboado-rihoeimb-ani asu ai refembo ehu ana, randeambui ranimboane asu sihiri sihefi hohoanimo moaruwai ranahambo weindahi hoafindefani ai

sihefi hohoanimo moaruwai ra gogorindihembui asu rananimbo sihiri aboedindemboyefi. ¹⁰ God ai hoafiyuhü yahuya, 'Nindou munḡuambo hohoanimo moaruwaimb-anei,' mehu, ḡga asu sihiri hoafiyefihüya, 'Roana moai moaruwai hohoanimoyefi rihundi,' asefi ana, sihiri rarihu hoafiyefihüya, 'God ai tikare-hayamboani,' sefuhane fi. ḡga ahandi hoafi ra moai sihefi ḡgusüfoambe nimaro.

Krais ai sihefimbo fehefemunimboani

2 ¹Wandi nimoakidibou, se moaruwai hohoanimo-ndeimboyei saheheamboanahi sürü nda paparihandi. ḡga sihiri ḡgorü ai moaruwai hohoanimonduan sihefimbo farihefe-mbohünda God-dibo sihefi mbüsumo Sisas Krais ai didiboado-reandeimbi-mbofi nünḡumboani. ²ḡga aiyu sihefi moaruwai hohoanimo gogorimarihenda asu sihiri God-dibo wudayefi. ḡga moaruwai hohoanimo ra sihefi yangiriyopoani, ḡga munḡuambo nindou-yafe-ane. ³Sihiri Godindi ahinümbi hohoanimo süngundihundühi rananimbo randihu diboadindihu fifirindi-humboyefi, ro ahambo fifirihini. ⁴ḡga nindou mami ai hoafiyuhüya, 'Ro Godimbo fifirihini,' ehu ana, asu Godindi ahinümbi hohoanimo moai süngureandi, nindou ra tikare-hayamboani, ḡga anihondü hoafi ahandi ḡgusüfoambe moai nimaro. ⁵Nindou mami ahandi hoafi sünguarandi ranai ana Godimbo ḡgusüfohüri-reimbi hamind-ani. Rananimbo randihu diboadondihu fifirindi-humboyefi, sihiri God-babidimboanefi. ⁶Nindou mami ai hoafiyuhüya, 'Roana God dibo-anehi,' mbüsuani nindou ranai Sisas ramefiyu nou refimboani.

Nindou ahandi wandafi mamimbo ḡgusüfo parareandüri ana, ai sirihü hu arandi

⁷Wandafi mami, ahinümbi hohoanimo siheimbo sürü paparihandi nda simboriyo-poani, ḡga wamindaf-ane horombo hondü se himbori-yei mburihü masahümündi. ⁸ḡga ahinümbi hohoanimo ra asükaiya siheimbo simbori simborihe sürü paparihandi. Krais ai hohoanimo ra süngure marandi asu se amboa süngurühi marihündi, ranimboane asu hohoanimo ra anihond-ane sefi fifirarihundi. ḡga asu nimbi munḡuihimbo si anihondü sirihoi anḡgo. ⁹Nindou mami ai hoafiyuhüya, 'Ro sirihü animboahi,' yahuhü ai ahandi wandafi ḡgorümbo yiḡoaruko-areandi ana, nindou ranai awi nimbokoan-ani anḡgu. ¹⁰Nindou ahandi wandafi mamimbo ḡgusüfo parareandüri ana, nindou ranai sirih-ani anḡgu, ḡga ḡgiri ḡgorü-moatükuni ahambo randerani püнду. ¹¹ḡga nindou ai ahandi wandafi ḡgorümbo yiḡoaruko-areandi ana, nindou ranai nimbokoan-ani anḡgu. Asu ahandi himboarambe nimbi nimarimbo-wambo ai nafi bibai-bibaindümbui.

¹²Nimoakidibou, Sisasindi sünguyo God ai sihei moaruwai hohoanimo gogori-marihendi. Ranimboanahi hoafi nda siheimbo sürü paparihandi.

¹³Boagiri, Nindou nda horombo hondü nüngu humbo haponda anüngu ndanahambo se fifirüwuri, ranimboanahi sihamumbo hoafi nda sürü paparihandi.

Akohoandi, se hamarihoemonda Satan ai amomefiyu, ranamboanahi sihamumbo hoafi nda sürü paparihandi.

Nimori, se Ape God fifirihori, ranimboanahi siheimbo hoafi nda sürü paparihandi.

¹⁴Boagiri, Nindou nda horombo hondü nüngu humbo haponda anüngu ndanahambo se fifirüwuri. Ranimboanahi sihamumbo hoafi nda sürü paparihandi.

Akohoandi, se nginind-anemo asu Godindi hoafi sihamundi ngusüfoambe amaro, nga raniyo se hamarihoemonda Satan ai amomefiyu, ranimboanahi sihamumbo hoafi nda sürü paparihandi.

Ngiri sihiri hifinindi moatükunimbo hohoanimondefi

¹⁵Se hifinindi moatükuni asu hifinindi hohoanimo ranahambo ngiri hohoanimondei. Nindou ai hifinindi moatükuni asu hohoanimo ranahambo hohoanimoaye ana, ai moai Godimbo hohoanimoyei.

¹⁶Hifinindi hohoanimo-ane nda: Moaruwai hohoanimo ngusüfoambe botife hohoanimo, hohoaji hohoanimo asu bori hohoanimo. Hohoanimo ra Godindi-mayopoani, nga hifinindi hohoanimo-ane. ¹⁷Hifinindi hohoanimo asu hifinindi ngusüfoambe botife hohoanimo amboa ra muṅgundimboe, nga nindou ai Godindi hoafi süngurühi arihündi ai gedühi koadürümbo-koadürümbo nimboeimboyei.

Kraisindi hürütümbi tüküfimboani

¹⁸O, nimoakidibou, hapoana ndeara bidifiranambo si akim-ane. Horombo se hoafi rarihi himborimaye, Kraisindi hürütümbi düdümbui masei, nga hapoana Kraisindi hürütümbi afindi tüküyahimboanei.

Rananimbo asu hapoana ndeara bidifiranambo si akim-ane ra fifirihundi. ¹⁹Kraisindi hürütümbi ai sihirihündi-yomopoani, nga ranimboanemo hiniṅgi-rumunimboemo. Iṅga ai sihirihündimbemombonana, sihiri mami koadürümbo niboadefi. Iṅga sihirihündi hiniṅgi-rumunimboanemo ranamboanefi wudipoaporühu fifirarihundi nindou muṅgu ranai sihirihündi-yomopoani. ²⁰Sisas ai siheimbo Yifiafi Aboedi masagadüra ranimboane asu se muṅgu anihondü fifirarihindi. ²¹Se anihondü ra fifirihindisi, nga se fifirifekoate-anei saheheambo-yahipoani sürü paparihandi, nga wani. Se yarihi fifirarihindi tikai hohoanimo ngiri anihondü hohoanimo rani nimindihü tükündifeyo. Se ra fifirarihindi, ranimboanahi siheimbo sürü paparihandi. ²²Nindou ai hoafiyeyi, 'Sisas ai Kraisiyupoani,' ase ana, ranai tikai hoafümb-anei. Nindou rananei God arimbiniṅbo daboadi hihirihipiri arihündi asu

Kraisindi hürütümbaye. ²³Nindou ra Nimorimbo daboadi hihirihori arihündi ranana God ai ahei afindiyupoani. Iḡga nindou ai Sisas Nimori ranahambo anihondümbo-arihori rananimbo God ai-amboa ahei afind-ani.

Godindi Yifiafi sihefimbo anihondümbo fifirareamuni

²⁴Hoafi ra horombo se himboriyeimb-ane se kikihisafi-ndihümündi. Se hoafi ra kikihisafi-ndihümündiani Sisas arimbini ai siheimbo kikihisafindinandüri-mboyafani. ²⁵Ai anihondümbo horombo-nambore hoafiyuhü yahuya, 'Ro randiheanda se yaḡgiri gedühi niboadeimboyeyi,' mehu. ²⁶Nindou ai se tikai hoafi ranahambo anihondümbo-fembo mehomorarahamumbo siheimbo sürü paparihandi. ²⁷Iḡga se Kraisindi-mayo Yifiafi Aboedi sahümündi hehimbo siheimbo sowahi aniḡgo, ranimboane asu moai didai-amboani siheimbo yamundearü, ḡga wani. Yifiafi Aboedi ai muḡguambo moatükuni yamundearü arandi asu ahandi yamundife ra tikaipoani, ḡga anihond-ane. Ranimboane se Krai ranahambo kikihisafa-ndihorimindei Yifiafi Aboedi ai yamundimarearü nou. ²⁸Yini, nimoakidibou, se ai-babidi niboadeimboanei. Ranimboane ai weindahi tüküfi simboani rananimbo sihiri yihimbokoate niboademboyefi, ḡga ahandi himboahü ḡgiri amoaḡḡi-ndefi. ²⁹God ai diboadorihoeimb-ani ra se fifirarihindi, ranimboane asu se rarihi fifirarihindi, nindou diboadore hohoanimoayu ranai Godindi nimor-ani.

Haponda sihiri Godindi nimor-ane fi

3 ¹E awi, Ape ai sihefimbo ḡgusüfo pareandüri-mboani. Ranane asu ai sihefimbo wandi nimor-ane fi, ehu. Iḡga anihond-ane, sihiri ahandi nimor-ane fi. Ranimboane asu hifinindi nindou ai sihiri Godindi nimor-ayefi ra moai fifirihimuni, Godimbo fifirifi-koate-wambo. ²O wandafi mami, haponda sihiri Godindi nimor-ane fi. Iḡga süḡgunambo-animbo nüḡgundihu mamandefi ra moai fifirihundi. Iḡga ra diboadorihu fifirarihundi, Krai ai tükündifiyuani, sihiri ahambo diboadondihuri hoeindihurüh-animbo asu sihiri Krai nahurai-ndemboyefi. ³Muḡguambo ai ranimbo hohoanimoyeihi Sisasimbo hifandarihori ranai ahei hohoanimo diboadorihi arihündi Sisasindi hohoanimo aboedayo nou. ⁴Nindou ai hohoanimo moaruwaiyu arandi ra Godindi ahinümbi hohoanimombo moaruwaimbo-reandühani. Hohoanimo moaruwai ra ahinümbi hohoanimombo moaruwaimbo-reandühani. ⁵Se rarihi fifirarihindi Krai ai moaruwai hohoanimo ra gogorihefembo yahumboyu tüküme fiyu, ḡga ahambo sowahi moai hohoanimo moaruwai yaḡgoro. ⁶Nindou Sisas-dibo anüḡḡu ranai moai hohoanimo moaruwai hohoanimoyu randi. Iḡga nindou moaruwai hohoanimoyu arandi, ranai ana Sisasimbo moai horiri asu moai fifiriri rarahandi. ⁷O nimoakidibou,

hibadümbö, nga nindou mami siheimbo tikai hoafindümbui. Nindou didiboadore hohoanimoyu ranai didiboado-rihоеimb-ani Sisas didiboado-rihоеimbayou nou. ⁸Nindou moaruwai hohoanimoyu arandi ranai Satanindi nimor-ani. Sapo horombo hondü rani-süngure hayamboani humbo haponda Satan ai moaruwai hohoanimö ra süngure arandi. Ranimboyu asu Godindi Nimori ai Satanindi ratüpuri moaruwai ranahambo raguanambo-fembo weindahi tükümeñiyu. ⁹Nindou ai Godindi nimor-ayou ranai moai moaruwai hohoanimoyu randi, nga ai God dibo-ani ranimboane ai ngiri moaruwai hohoanimö süngundeandi, nga wani. Ai Godindi nimor-ani. ¹⁰Naha fifindi-humboane düdi Godindi nimor-ayou, düdi Satanindi nimor-ayou? Randihu fifindi-humboane. Nindou ai mamikari hohoanimönduani ai Godindi-yupoani. Asu nindou ai ahandi wandafi mamimbo ngusüfo pefekoate-ayou ana, ranai-amboa Godindi-yupoani.

Wandafi mamimbo simbori ngusüfo pefendürimbo hohoanimö

¹¹Horombo hondü se hoafi rarihi himborimayei, sihefihoari simbori ngusüfo pefiri-ndefimboane. ¹²Sihiri Ken rameñiyu nahurai ngiri nimboefi. Ai Satanindi nimor-ani, nga ahandi akidambo hifokoamariri. Nimboe hifokoamariri? Ahandi hohoanimö moaruwai-ane, nga ahandi akidandi hohoanimö aboed-ane ranimboyu asu ahambo hifokoamariri. ¹³Wandafi mami, hifinindi nindou ai siheimbo yiboaruko-ndihindürani se ngiri ranahambo hepünindahindi. ¹⁴Sihiri sihefihoari simbori ngusüfo pefiriyefi arihundi ranimboane asu sihiri rarihu fifirarihundi sihiri yifimbo hohoanimö ra hiningi-marihundi, nga yanggiri ningombo hohoanimö sünguarihundi. Nindou ai ahandi wandafi mamimbo ngusüfo pefekoate-ayou-animbo ranai awi yifimbo hohoanimö süngureandühani. ¹⁵Nindou ai ahandi wandafi mamimbo yiboarukore arandi ranai hifokoare-randeimbi nahurai-ani. Nga se fifirarihindi hifokoare-randeimbi ai ngiri yanggiri gedühi nüngu. ¹⁶Sisas ai sihefimbo farihefe-munimbo yifimayou, nga asu raninambo ngusüfo pefe hohoanimö fifirarihundi. Sihiri amboa rani-süngundahumboane wandafi mamimbo fehefe-ndürimbohündambo yifimboane. ¹⁷Nindou mami ai napombüyou, nga wandafi mami hondirani ai waninduani ana, asu ai wandafi mamimbo ngusüfo pefekoate-ayou ana, Godindi-mayou ngusüfo pefe hohoanimö ra ahandi ngusüfoambe moai nimaro, nga wani. ¹⁸Wandi nimoakidibou, sihiri ngiri wandafi mamimbo hoafi yanggiri ngusüfo pandihundüri, nga sihiri aheimbo anihondümbö hondü fandihuhu-ndürimboane.

Sihiri Godindi himboahü ngiri yihombondofi

¹⁹Sihiri ngorü nindoumbö ngusüfo pandihundani rananimbo anihondü hohoanimö sünguri-hundühanefi ra fifirarihundi, nga ranimboane asu

Godindi himboahü sihefi ngusüfoambe afundiho hohu niboademboyefi. ²⁰Asu sihefi ngusüfoambe yiboaruko-ndihimunani, ambe! Sihiri rarihu fifirarihundi God ai adükar-ani, nga sihefi ngusüfoambe adükariyopoani. Nga asu God ai muŋgu fifirareandi ra. ²¹O Wandafi mamî, sihefi ngusüfoambe sihefimbo yiboarukofe-koateyeiani, sihiri Godindi himboahü moai yihimboyefi. ²²Sihiri ahandi ahinümbi hohoanimo asu ai hohoanimoayu ranahambo süngundi-hundani animbo asu ranani moatükuni sihiri Godimbo düdundahundoani ai sihefimbo ndayamunümbui. ²³Ahandi ahinümbi hohoanimo nda: ahandi Nimori Sisas Kraiss ranahambo anihondümbö-ndihindühi asu siheihoari simbori ngusüfo pefindürindei Sisas sihefimbo hoafimayu süngu. ²⁴Nindou mamî ai Godindi ahinümbi hohoanimo sünguarandi ana, ai God-dibo nimandimbui asu God ai-dibo nimandimbui. God ai ahandi Yifiafi masemuni ranimboane asu sihiri rarihu fifirarihundi God ai sihefimbo sowahi amaru.

Godindi Yifiafi Aboed-ane asu bidifiri yifiafi moaruwai-anei

4 ¹O wandafi mamî, Godindi hoafi tikai hoafiyomo-rundeimbi afindi hifini ahoahoangomo. Nga nindou siheimbo hoafindomondühi, 'Ro Godindi Yifiafumb-anahe,' mbisimondani, se muŋguambo ra anihondümbö-ndihimboyei. Nga se yifiafi muŋgu ranahambo randihi hondihindühi Godindi-mayoyo asu hifinindiyo ra randihi fifirindihindi. ²Se Godindi Yifiafi Aboedi randihi fifindihimboyei ra: Nindou ai hoafiyuhü, 'Sisas Kraiss ai nindoubomefiyu,' mbüsüani ana, nindou ranai Godindi Yifiafi Aboedümb-ani. ³Nga nindou ai hoafiyuhü Sisass ai moai nindoumbofiyu mbüsüani ana, nindou ranai Godindi Yifiafi Aboedümbi-yupoani, nga moaruwai nendeimb-ani. Nindou ra Sisasindi hürütümb-ani se himboriyeiani ai düdümbui masei, nga sünumboani. ⁴O nimoakidibou, se Godind-anei, nga Godindi Yifiafi Aboedi sihei fiambe amaro ranai hifinindi nendi moaruwai ranaheimbo ngasünda-reandüri, nga se ranaheimbo harihehimboane. ⁵Nindou ranai hifinind-anei, nga ranimboane ahei hoafi ra hifinind-ayo. Nga hifinindi nindou muŋgu ai ahei hoafi ra himboriyei arihündi. ⁶Nga sihiri Godind-ane fi asu nindou ai Godimbo fifirarihori ranai sihefi hoafi himboriyei arihündi. Nga nindou ai Godindi-yeipoani ranai ngiri sihefi hoafi himborindei. Rananimbo sihiri anihondü Yifiafi ranane, tikai yifiafi ranane ra fifindi-humboane.

God ai ngusüfo pefe hohoanimo nimindih-ani

⁷O wandafi mamî, God ai ngusüfo pefe hohoanimo nimindih-ani asu sihiri wandafi mamimbo ngusüfo pandihu-ndürimboane. Nindou ai ngusüfo pare arandi rananimbo ai Godindi nimor-ani asu ai Godimbo fifirariri. ⁸God ai ngusüfo pare-randeimb-ani asu nindou ai

wandafi mami ngusüfo pefekoate-ayei ranai moai Godimbo fifirihori. ⁹God ai Nimori mamümb-ani, nga asu raniyu sihiri yangiri gedühi niñgombohündambo Nimori ra koamariheiri. Ranimboyu asu God ai sihefimbo ahandi ngusüfo pefe ra weindahi nafuimaramuni. ¹⁰Ŋga ngusüfo pefe ra rahurai-ane. Moai sihiri Godimbo ngusüfo parihuri, nga God ai sihefimbo ngusüfo pareamunühi sihefi moaruwai hohoanimo ra gogori-hefembohündambo ahandi Nimori hifina koamariheira kusü yifimayu. ¹¹O wandafi mami, God ai sihefimbo afindi ngusüfo parareamuni ranimboane asu sihiri amboa simbori ngusüfo pefirindefimboane. ¹²Nindou mami ai-amboani moai Godimbo horiri. Ŋga sihiri simbori ngusüfo pefirayefi ana, rananimbo God ai sihiri-babidi anüngu asu ahandi ngusüfo pefe hohoanimo sihefimbo adükari hamindi tüküfemboane. ¹³God ai ahandi Yifiafi Aboedi sihefimbo masemuni ranahambo fifirarihundi ana, God ai sihiri-babidi anüngu asu sihiri ai-babidi aniboade fi. ¹⁴Ape God ai hifinindi nindou farihefe-mbohündambo ahandi Nimori koamariheira makusu. Ra ro hoeirihu hoahumboanefi bokarihehu arihundi. ¹⁵Nindou ai weindahi hoafiyuhü, ‘Sisas ai Godindi Nimor-ani,’ ehü ana, God ai nindou ra-dibo nüngumboani asu nindou ranai God-dibo nüngumboani. ¹⁶Asu God ai sihefimbo ngusüfo parareamuni ra fifirihu mburihu anihondümb-arihundi. God ai ngusüfo pefe nimindih-ani. Nindou ai ngusüfo pefe hohoanimo sünguareandi ana, ai God-dibo anüngu asu God ai-dibo anüngu. ¹⁷Godindi ngusüfo pefe hohoanimo ra sihefimbo adükari hamindi tükefembo nahurai-ane: Sihiri diboadondihu ngusüfo pandihundani animbo sihiri Sisas hifini manüngu nahurai nimboemboyefi. Ranimboane asu God ai münguambo nindou yibobonde-andürani rasimboani ngiri yihimbondefi. ¹⁸Ŋgorümbo ngusüfo parihi-rihündeimbi ai ngiri yihimbondei. Ŋgusüfo pefe hohoanimo ra adükari hamindi tükündifeyoani yihimbo ra raguanimbondifemboe. Yihimbo hohoanimo nimindih-ane ra: God ai nindou-yafe hohoanimo moaruwai ranahambo rani tinjirifo dagadürimbui. Nindou ai yihimboyei arihündi ranaheimbo Godindi ngusüfo pefe hohoanimo moai adükari hamindi tüküfeyo. ¹⁹God ai-boatei sihefimbo ngusüfo pamareamuni ranimboanefi asu sihiri ahambo ngusüfo pararihuri. ²⁰Nindou mami ai hoafiyuhüya, ‘Ro Godimbo ngusüfo pararihini,’ yahuhü asu ahandi wandafi mamimbo yihoaruko-areandi ana, nindou ranai tikai hoafimb-ani. Nindou ranai nindou hoeireandürühi ranaheimbo ngusüfo pefekoate-ayu ana, asu God hoeifekoate-ayu ranahambo ngiri ngusüfo pandiri. Ŋga nindou ahandi wandafi mamimbo hoeireandürühi ranaheimbo ngusüfo pefekoate-ayu, asu nüngunde God hoeifekoate ranahambo ngusüfo pamandira? ²¹Hohoanimo nda sihiri Kraisindi-mayo masahumindefi ra, nindou ai Godimbo ngusüfo parariri ranai ahandi wandafi mamimbo-amboa ngusüfo pambirea-ndüramboane.

Anihondümborihindeimbi ai hifinindi hohoanimo pühiyei afoasihindi

5 ¹Nindou muŋgu Sisas ai Kraisi-ani sei anihondümborihindi ranai Godindi nimor-anei. Iŋga nindou muŋgu Afindambo hohoanimoaye ra asu Nimorimbo amboa hohoanimo-yeihanei. ²Sihiri Godimbo hohoanimoyefühi asu ahandi ahinümbi hohoanimo sünguarihundi ana, ndarihu sihiri fifirarihundi: Sihiri Godindi nimor-anehi. ³Godindi ahinümbi hohoanimo sünguarihundi ana, ahambo ŋgusüfo parihuri arihundi, ŋga ahandi ahinümbi hohoanimo süngufembo tinjümbiyopoani. ⁴Muŋgu Godindi nimor-aye ra hifinindi hohoanimo ra pühiyei foasihindühanei. Godimbo anihondümborihurimboanehi ranimboane hifinindi hohoanimo moaruwai ra pühiyefi foasihumboanehi. ⁵Iŋga didiyei hifinindi hohoanimo ra pühiyei afoasihindi? Nindou ai Sisasimbo Godindi Nimor-ani seihü anihondümborihori ranai hifinindi hohoanimo ra pühiyei foasihindühanei.

Sisas ai ahandi Nimor-ani ra God ai nafuimaramuni

⁶Sisas Kraisi ai kusü hoenambo hundürüyu asu nimi keimbi karihedeimbifihahi ahandi hori peyowohü asu ai yifimayu. Iŋga ai kusü hoenambo hundürümbo yanggiryupoani, ŋga ahandi hori peyowohü asu ai yifimayu. Godindi Yifiafi anihondümborani hoafi ra anihondane yaho nafuiarandi. ⁷Iŋga ŋgimi ai anihondümborihondü hoafimaye. ⁸Godindi Yifiafi Aboedi, hoe, hori, ŋgimi ranai hoafi hoafimaye, ŋga ahei hoafi ra mamane. ⁹Nindou ai anihondümborihofi hoafayomo ana, ahamundi hoafi anihondümboridihumboyefi. Iŋga Godindi anihondü hoafi ra nindou-yafe hoafi ŋgasünde-andühane. Iŋga God ai hoafi ra ahandi Nimorimbo-hündambo anihondümborihofi hoafimayu. ¹⁰Nindou ai Godindi Nimorimbo anihondümborihori rananimbo ai ŋgusüfoambe yare fifirareandi Sisas ai Godindi Nimor-ani. Iŋga nindou ai Godindi hoafi anihondümborihofi-koate-ayu ana, Godindi anihondü hoafi ahandi Nimorimbo hoafimayu ra moai anihondümboreandi. Ranana ai Godimboya, 'Ai tikai hoafiyu-randeimbani,' yahu arandi. ¹¹Godindi anihondü hoafi nda: God ai sihefimbo ramareamuna sihiri gedühi yanggiri niboademboyefi. Iŋga yanggiri niŋgombo ra Godindi Nimori ai nimindih-ani. ¹²Nindou Godindi Nimori-dibo anüŋgu ai gedühi yanggiri nüŋgumbui. Iŋga nindou ai Godindi Nimori-dibo niŋgokoate-ayu animbo, ai gedühi yanggiri niŋgokoate-ndümbui.

Sihiri yanggiri gedühi niboademboyefi ra fifindihumboane

¹³Se Godindi Nimorimbo anihondümborihori-rihündeimbanehi, siheimbo hoafi nda sürü paparihandi. Se gedühi yanggiri niboademboyefi ra fifirimbi-rihinda sahehea sürü paparihandi. ¹⁴Ranani

moatükuni God yifirayu ranimbo ahambo düdundihurani sihefi hoafi himborindimbui. Nga ra fifirarihundi rananimbo asu ahambo hoafimbo moai yihimborihuri rihundi. ¹⁵Nga ahambo düdundihurani sihefi hoafi himborindimbui ra fifirarihundi. Rananimbo ranani moatükuni refembo ahambo düdundihurani sihefimbo randeambui ra fifirarihundi. ¹⁶Bidifiri hohoanimo moaruwai nindou mami ai randeandani rananimbo ai awandihoembui. Nga bidifiri hohoanimo moaruwai nindou rawareandi ana, ngiri awandihoayu. Kristen ngorü ai hohoanimo moaruwai rawareandi ana, asu ngorü Kristen ahambo hoeindirani-wani ai ahambohündambo Godimbo didibafindümbui. Rananimbo asu God ai ahambo fandiheirani yangiri nüngumbui. Nga awarihoeimbi hohoanimo moaruwai sapo horombo hoafimayahi ranahambo Godimbo didbafifembo moai hoafiyahi. ¹⁷Munquambo hohoanimo didiboadofo-koateayo ra ai hohoanimo moaruwai-ane, nga bidifiri hohoanimo moaruwai nindou ai rawareandi rananimbo ngiri ai awandihoayo. ¹⁸Sihiri ndarihu fifirarihundi: Godindi nimori ai moai hohoanimo moaruwai süngurihi rihüdi, nga wani. Nga Godindi Nimori Sisas ai aheimbo hifandandüri arandi, nga Satan ai ngiri aheimbo kündifi hündamündündüri. ¹⁹Nga sihiri ndarihu fifirarihundi: Sihiri Godindi nimor-ane, nga Satan ai hifinindi nindou mungu hifandirandüri arandi. ²⁰Asu sihiri ndarihu fifirarihundi: Godindi Nimori kusü anihondü God ranahambo fifirifimbohünda sihefimbo yamunde hiniŋgire-amunimboani. Nga sihiri God arimbini Sisas Krais-babidimbo animboefi. Ai God hond-ani asu koadürümbo-koadürümbo yangiri niŋgombo nimindih-ani. ²¹O nimoakidibou, se tikai godimbo hohoanimo-mboyopoani. Karihasihandüri.